

16 SEP 1999

Mahathir-Buku

DR MAHATHIR LANCAR PRODUK MENGENAI LABUAN

LABUAN, 16 Sept (Bernama) -- Datuk Seri Dr Mahathir Mohamad hari ini melancarkan beberapa produk keluaran Lembaga Pembangunan Labuan untuk mempromosi pulau ini sebagai satu destinasi pelancongan yang menarik.

Produk-produk itu merupakan buku "Panduan Perniagaan dan Pelancongan Labuan", Video Cakera Padat Labuan dan Hompej Labuan serta sebuah buku terbitan Universiti Malaysia Sabah bertajuk "Layang-layang: Drop In The Ocean".

Perdana Menteri melancarkan produk-produk itu pada majlis jamuan tengahari bersama pemimpin Umno, Barisan Nasional, pegawai kerajaan dan swasta serta pemimpin pertubuhan bukan kerajaan di Dewan Persidangan, Ujana Kewangan di sini.

Pengarah Pentadbiran Labuan Datuk Mohamad Mohamed Noor dalam ucapannya berkata kedatangan pelancong ke Labuan sudah meningkat menandakan pulau itu sedang menuju ke arah pemulihan ekonomi.

Katanya bagi tempoh Januari hingga Jun tahun ini seramai 169,314 orang pelancong tempatan telah melawat pulau bebas cukai ini berbanding 150,314 orang bagi tempoh yang sama tahun lalu.

Dalam tempoh yang sama seramai 34,269 pelancong asing telah mengunjungi pulau ini meningkat sebanyak 44 peratus berbanding hanya 18,956 pada tahun 1998.

Katanya lembaga itu akan terus meningkatkan usaha memperbaiki taraf infrastruktur di pulau ini bukan saja sebagai pulau bebas cukai tetapi juga pulau perniagaan dan pelancongan yang unggul.

Beliau berkata produk-produk itu akan diedarkan ke seluruh dunia dalam beberapa bahasa

Sementara itu Timbalan Naib Canselor Universiti Malaysia Sabah Prof Dr Ghazali Ismail berkata buku "Layang-layang: Drop In The Ocean " adalah karya beliau bersama dua saintis marin, Nicolas Pilcher dan Steve Oakley.

Beliau berkata mereka mereka mengambil masa kira-kira dua tahun untuk menulis buku itu yang mengandungi banyak gambar-gambar menceritakan tentang keindahan Pulau Layang-Layang.

Beliau berharap Kerajaan akan menggunakan sepenuhnya gambar-gambar yang terdapat dalam buku itu untuk mempromosikan Pulau Layang-Layang sebagai destinasi pelancongan terutama yang berminat dengan aktiviti menyelam.

"Saya juga berharap buku ini memberikan kesedaran kepada kita supaya menjaga keindahan terumbu karang dan hidupan laut yang terdapat di negara ini termasuk di Pulau Layang-Layang yang wujud sejak 35 juta tahun dahulu," katanya.

-- BERNAMA

MT RON